

BIRINCHI KITOBIM


Elyor MUROD

TIRIKLIK QO'SHIG'I



She'rlar

**Cho'lpon nomidagi nashriyot-matbaa ijodiy uyi
Toshkent – 2017**

 UO'K 821.512.133-1
KBK 84(50')7
M 89

Mas'ul muharrir
Nodir JONUZOQ

Murodov, Elyor
M 89 Tiriklik qo'shig'i [matn]: she'rlar/E. Murodov. – T.: Cho'lpon nomidagi NMIU, 2017. – 32 b.
ISBN 978-9943-05-970-2

Ushbu kitob O'zbekiston Yozuvchilar uyushmasi tomonidan o'tkazilgan «Iste'dod maktabi» Respublika yosh ijodkorlari seminarida nashrga tavsiya qilinib, «Ijod» jamoat fondi tomonidan moliyalashtirilgan.

UO'K 821.512.133-1
KBK 84(50')7

ISBN 978-9943-05-970-2



© E. Murodov, 2017
© Cho'lpon nomidagi NMIU, 2017



YODIMDA

*Momolarim sochlarini qirqta o'rib o'tgan yer,
Bobolarim necha avlod suyak surib o'tgan yer.*

Halima Xudoyberdiyeva

Yomg'ir yuvgan qirlarimda lolalarim
o'sgan yer,
Moychechakli tuproqlarda dalalarim o'sgan yer.
Momolarim urchug'iday chir aylanar bu dunyo,
Bobolarim duo qilib balolarni to'sgan yer.

Xayr yog'ar, oydin nurli ko'chalarim yodimda,
O'lan aytar, qiz bo'lguvchi chechalarim yodimda.
Ot choptirgan tog'alarim hayqirar
or talashib,
* Akalarim kurash tushgan kechalarim yodimda.

Suvlar yurgan adirlarda ko'zim oqdi, oymomo,
Ikki daryo orasida so'zim oqdi, oymomo.
Onamning ko'zlarini toliqtirar izlarim,
Eh, kimlarning ko'chasiga yo'lim oqdi,
oymomo.

Yomg'ir yuvgan qirlarimda lolalarim
o'sgan yer,
Qulunlarning izin quchib, dalalarim
o'sgan yer.
Momolarim urchug'iday chir aylanar bu dunyo,
Bobolarim duo qilib balolarni to'sgan yer.





ALLA

*Oybarchin o'g'li Yodgorning beshigini
tebratib turib shunday alla aytgan ekan.*

Otang ketdi Qalmoqqa,
Dushman jonin olmoqqa.
Bolam, kelding dunyoga
Bor zahmatni tortmoqqa.
...alla, alla, alla-yo...

Qo'ng'irotdir urug'ing,
Baland bo'lsin dovrug'ing.
Bir kun kelib ko'rayin,
Bolam, sening dovliging.
...alla, alla, alla-yo...

Ko'rganing shu hayotdir,
Yurt uchun tonglar ottir!
O'g'lim, halovatdan kech,
Senga nomardlik yotdir.
...alla, alla, alla-yo...

Hayoting tiniq bo'lsin,
Maqsading ulug' bo'lsin.
U dunyo-yu, bu dunyo –
Yuzlaring yorug' bo'lsin.
...alla, alla, alla-yo...

Onang – munglug' Oybarchin,
Yuragi parchin-parchin.
«Haq!» degil...
Yolg'on to'zgay,
Kamon tortsa agar Chin!
...alla, alla, alla-yo...



ALPOMISH HAQIDA SHE'R



Osmon to'la bulutdir,
Ko'rinmaydi quyoshim.
Yurak, dardni unut bir,
To'kilmasin ko'zyoshim.

Chohga tushdi yuragim,
Alpomishga aylandi.
Ko'nglimdagi bir g'anim
Barchinimga uylandi.

Yurak, qismatimiz sho'r,
Hayot chohga otgandi.
Muhabbatning ko'zi ko'r,
Sevdingmi – qilgay bandi.

Endi qayg'u yog'ida
Dog' bo'ladi dardlarim.
Oq g'ozning oyog'ida
Uchib borar xatlarim.

Yetti yilmas, yetmish yil
Yurak chohda asraldi.
G'anim ko'ngil, g'arib dil,
Yurak – yetim, asrandi.

Yurakni qutqargali
Qorajonlar kelmadi.
Ultontoz g'olib hali,
Nohaqliklar o'lmadi.

Bir kun Boychibor kelar,
Qirq gaz o'sadi yoli.
Uchqur otday vaqt yelar,
Chorlar Vatan jamoli...

...Boysunga qaytdi yurak!
Ultontoz topshirdi jon.



Hasratlar ketdi yiroq,
Zindonga tushdi hijron.

Yurak ozod! Yurak hur!
Yurak she'r, kuyga moyil.
Bir qarasang – hofiz ul,
Bir qarasang – u shoir!



O'GIT

Alpomish Qalmoqda zindonda yotib o'g'li Yodgorga aytmoqchi bo'lgan gaplarini o'rgimchakka qarab so'zlab o'tirardi. Alpomishning ko'nglida tug'ilgan, tug'ilgan-u, yurakka tugilgan so'zlari bu turur.

Nomard urushda bilinadi,
Yuzma-yuz turishda bilinadi.
Do'st tutsang nokasni agarda,
Yuraging bepichoq tilinadi.

Tuningda halovat bo'lmaydi,
Kuningda barokat bo'lmaydi.
Nomardga yondoshma, bolam-a,
U kulsa, iqboling kulmaydi.

Ishonsang o'zingga ishongin,
Beriyo so'zingga ishongin.
Nomardga ishonma hech qachon,
Quloqmas, ko'zingga ishongin!

Do'st bilma tasodif hamrohni –
Yaxshilikni bilmas gumrohni.
Yodingdan chiqmasin bu so'zim:
Unutma Vatandek panohni.

Sodiq bo'l hamisha xalqingga,
Yuraging – sayroqi oqinga.
Yap-yangi va toza yo'l topgin,
Qo'shilma kir, quyqa oqimga.

O, shunda chin inson bo'lasan,
Tilasang ne, ishon, bo'lasan.
Baxshilar tilida bir kuni
Eng buyuk bir doston bo'lasan!



MALIKA

Dilni dilga boyladim,
«Ishq – hayot!» deb kuyladim.
Muhabbat deb kuydim-u,
O'zim uchun kuymadim.

Dilim elanib borar,
Ma'yus emranib borar.
Ostonangga, bechora,
G'amga talanib borar.

Sen bõqmaysan, qoshingga
Hilol qo'nib turibdi.
Ne desang ham, qarshingda
Beklar ko'nib turibdi.

O, aldanma, malikam,
Avramoqqa dunyo shay:
Beklar uchun sevgi ham
Bozordagi matchday.

Yurakni parcha go'sht deb,
O'ylaydi bu gumrohlar.
Ketyapman xayr-xo'sh deb,
Dilni tilar chaqmoqlar.

Bir kun ulardan bezib,
Men tomonga qaraysan.
Ko'nnglim taftini sezib,
Qalbingga o't qalaysan.





Deysan: «Seni poyladim,
Dilni dilga boyladim.
Sevgimga joy topolmay,
Yuragingga joyladim...»



KO'PKARI

Uloq ketdi, haytovur,
Chapog'onning qo'lida.
Bedov solar, urho-ur,
Or-nomusning yo'lida.

Ko'pkarimi, ko'kbo'ri,
Qadimdan qolgan o'yin.
Yigit ori, el ori,
G'olib chiqmoqlik qiyin.

Ilon izlar, chang izlar,
Sachrar qamchi ovozi.
Qora ko'zli bo'y qizlar
Tomosha qilar nozli.

Ayir... ayir, chapog'on,
Or seniki, qamchi bos.
Qo'ng'irotlik mehribon
Yor seniki, qamchi bos.

Ko'pkari – ko'pning ori,
Ko'pkari – halol kurash.
Elda chapog'on borki,
Obro' bo'lmas xomtalash.

Ot bilan chayir tanning
Joni birikib ketar.
Er baxti-la Vatanning
Shoni birikib ketar.



Bedov solar, urho-ur,
Or-nomusning yo'lida.
Uloq ketar, haytovur,
Chapog'onning qo'lida...



YODGOR MONOLOGI

Hayot tashvishlari boshimda bulut,
Yoshim yettidadir, ruhim yetmishda.
Bolalik kulgusi bo'lmishdir unut,
O, baxtli kunlarim qoldi o'tmishda.

Biy bobom suv tashir orqalab meshni,
Otamni sog'inib ko'r bo'ldi momom.
Qorajon zax yerga topshirdi to'shni,
Cho'lda cho'pon bo'ldi Qaldirg'och ammam.

Enamning umidi milt-milt yonadi,
«Biy bobomning o'g'li!» – uchadi ovoz.
Aslini unutib eldan tonadi,
Taxtda savlat to'kib qo'rqqoq Ultontoz.

Ota-a-aa... ovozlari ichimga cho'kar,
Qaylarda men hali ko'rmagan otam.
Suvliqqa jimgina ko'zyoshin to'kar
U bir bor egarlab minmagan ot ham.

Dunyo aylanadi: bahor, yoz, kuz, qish...
Termilib turibman ufqqa, hayhot.
Baxshi kuylayotir!
Qaytar Alpomish,
To elda bor ekan do'mbira va ot!





O'LAN

Ko'ksimdagi tosh ekan,
Ko'zimdagi tush ekan.
Vujudimga sig'magan –
Yurak emas, qush ekan.

O'lan kuydirar dilni,
Ojizlik tiyar tilni.
Bo'sh ko'ksim bilan qoldim,
Yo'qotdim yorug' yo'lni.

Tog'larda tosh qolmagan,
Ko'zimda yosh qolmagan.
Sabr ketib bormoqda,
G'amga bardosh qolmagan.

Sochim oqarmay o'lar,
Yuzim ajinga to'lar.
O, yuraksiz vujudim
Osmonga oshiq bo'lar.

Qiya yo'llar qiyildi,
Ola to'nlar kiyildi.
Ko'ksimdagi ozod qush
Yurak bo'lib quyildi.

Endi uchish qayda, oh,
Yurak tushgan manzil – choh.
Jim ergashib boryapman
O'z soyamga... Oy guvoh...



YOMG'IR YOG'AR...

Yomg'ir yog'ar... Qanday yoqimli,
Gulg'unchani ho'plagim kelar.
Ko'kdan ingan nurli oqimni,
Yuragimda to'plagim kelar.

Yomg'ir yog'ar... Qanday yoqimli,
Tuproqlarning hidiga to'ysang.
Aritadi dildan ohingni,
Lablaringda shabnamni tuysang.



Yomg'ir yog'ar... Qanday yoqimli,
Ko'k qo'lida qamchi bo'lolsam.
Bu dunyoda men ham chaqinli,
Guldurakli tomchi bo'lolsam...



BAHOR


Shamollarning sochlariga osiladi chechaklar,
Ko'kka qarab bo'y cho'zadi orzu, umid, tilaklar,
Ko'zin ochib termiladi novdadagi kurtaklar,
Yurakdagi muhabbatdek shoshib keladi bahor,
Anhordagi suylar misol toshib keladi bahor.

Yasanadi ko'k osmonning rangin olgan tabiat,
Charx uradi zamin uzra qaldirg'ochdek hur niyat,
Qish mag'lubdir, kurtak g'olib,
kurtak g'olib, xayriyat,
Xazonlarga obihayot berib keladi bahor,
Cho'qqidagi toza qorday erib keladi bahor.

Bobolar-u momolarda qismat qishi, kuzi bor,
Bu kun ular yuzida ham, navbahorning izi bor,
Go'daklarning ilk so'zida gulbahorning isi bor,
Adirlarda chechak bo'lib yayrab keladi bahor,
Jon qushiday ko'ngillarda sayrab keladi bahor.

Onam aytgan allalarda,
ko'klamning xush sasi ko'p,
Dehqon otam ketmonining qut-baraka, fayzi ko'p,



 Har bahordan, do'stim, bilsang,
yuragimning qarzi ko'p,
Bor sarvatin poyimizga sochib keladi bahor,
Yurakkacha borar yo'lni ochib keladi bahor...



ICHIKISH

Og'rinaman ko'nglim bilan jim,
Tashqariga qo'ymas meni qish.
Oliqlarda yig'laydi yum-yum,
Meni kutib onam boyaqish.

Ovozlarim qotar bo'g'zimda,
Qaltiraydi sovuqdan tanam.
Muzlaganday hatto ko'zim-da,
Yuragimni isitar onam!

Qaytolmadim, men noshud bola,
Borliq yutdi zaif nolamni.
Poyezdga bosh urdim: «Bir bora
Olib kelgin mening onamni».

Bahor kelar!
Gullaydi olam,
Nurga to'lib ketar hamma yuz.
Qishlog'imda kutadi onam,
Kutib turar vokzalda poyezd...



MUHABBATNING QO'SHIG'I

Sevgisidan judo bo'lib yondi yurak,
Chidolmadi, eh, baridan tondi yurak,
Erib, achchiq ko'zyosh bo'lib tomdo yurak,

Gul ko'nglida bahor emas, kuz yig'laydi,
Chimmatini yoshi yuvib, qiz yig'laydi.



Qaytib kelmas muhabbatni qo'msaydi zor,
Bundan ko'ra, yuragini ko'msaydi qor.
Unutolmas... Unutishga qo'ysaydi yor,
Gul ko'nglida bahor emas, kuz yig'laydi,
Chimmatini yoshi yuvib, qiz yig'laydi.

Qo'y, otangning aytganidan qolma, gulim,
Xudoyimning yozganidan tonma, gulim,
Meni faqat eslab yurgin, olmagulim,
Gul ko'nglida bahor emas, kuz yig'laydi,
Chimmatini yoshi yuvib, qiz yig'laydi.

Taqdirimiz ayro bo'lgan lahza kuysin,
Yuragimda armon laxcha-laxcha, kuysin,
Ikkimizni ayirdilar... hijron suysin,
Gul ko'nglida bahor emas, kuz yig'laydi,
Chimmatini yoshi yuvib, qiz yig'laydi.



BIRINCHI SEVGI

Shamollar uxlagan yoz tunlarida,
Atirgul bargida nafis bir sezgi.
Tovlanib, o'ynaydi qiz tushlarida,
Qalbida ko'z ochar birinchi sevgi.

G'arq bo'lar u tunning bag'riga butkul,
Tush ko'rar orzular og'ushida mast.
Visolga oshufta. Bilmas hali ul -
Hijron sharobini xush ko'rar qismat.

Va birdan uyg'onib ketar u ilkis,
Ko'nglida bir hadik sezadi shu dam.
Xona burchagiga cho'kkanicha tiz,
Tonggacha baxt so'rar menga Xudodan...





QO'SHNI QIZ

Kunni yutar yutoqqancha tun,
Yulduzlarning ko'zi ochilar.
Goh men uchun, goh onam uchun
Baxt izlaydi chaqqon sovchilar.

Shu bahorda bo'lsin deya to'y,
Har eshikni poylar ovchilar.
Qo'shnimizning sodda-yu xushro'y,
Duduq qizin ko'rmas sovchilar.

Unga alla aytar oy,
Tunga alla aytar oy.
Bu yolg'onchi hayotga
Haqiqatni qaytar, oy.

Suvga chiqib kelar qo'shni qiz,
Yengi yopar nozik bilakni.
Doimgiday obketar beso'z
Hijron to'la ikki chelakni.

Unga ertak aytar oy,
Tunga ertak aytar oy.
Bu yolg'onchi hayotga
Muhabbatni qaytar, oy.

Duduqqinam, meni sezgin-da,
Xizimatingga turibman-ku shay:
Yuragim limmo-lim... Sevgim-la
Chelagingni to'ldirib beray!



OY

Tun – bepoyon, qop-qora saroy,
Yulduzlar zar bezakdir unga.
Oy ko'rinmas, qayda qoldi oy,
Kerakmasmi bu sirli tunga?

Oy ko'rinmas – ko'k javohiri,
Qayga ketdi u, qayda qoldi?
Ko'zlarimdan qochib, oxiri,
Yuragimga berkinib oldi...



BEDORLIK

Uyqu yo'q. Tun. Soat erinchoq,
Xotiralar chulg'aydi purg'am.
Uziladi ko'hna ko'zmunchoq,
Qarsillab sinadi qobirg'am.

Qismating benavo, demakim,
Tomirimdan toshgaydir navo.
Bitta qobirg'am yo'q, demakkim,
Men Odamman, sen – Momo Havo.



TOMOSHA

Hayrat ila boqar olomon,
Tomoshaga bo'lganCHA maftun:
Turfa o'yin ko'rsatar shu on,
Maydonchada bir to'da maymun.

Rangin ishton kiymishdir biri,
Taqib olgan hatto bo'yinbog'.
Kiborlarcha tashlar ko'z qirin,
Sheriklari hushtak chalgan chog'.

Koptok o'ynar bittasi tinmay,
Boshi bilan urib qo'yadi.
Yana biri buyruqqa ko'nmay,
Tirjayadi – kulib qo'yadi.



Biri sakrar, bittasi chopar,
Qay birining belida halqa.
Xaloyiqning ko'nglini topar,
Ermak bo'lar zerikkan xalqqa.

O'yin qizir...
Tomosha so'ngi,
Chiqib kelar o'rtaga odam.
Maymunlar jim amriga ko'nib,
Tor qafasga haydalar shu dam.

Tomoshagoh qarsakka to'lar,
Hayqiriqdan bo'g'ilar nafas:
Olgishlarni bir odam olar,
Maymunlarni yutadi qafas...



HIJRON

Mening g'amgin she'rimni tinglab,
Ko'zyosh to'kib qolar deraza.
O'lim haqda she'r yozsam, ingrab
Eshik yig'lar – tutadi aza.

Tun quvadi xayollarimni,
Meni uyqu bag'riga olar.
Senga borgan oyoqlarimni
Ko'rpa bo'g'ib, tushovga solar.

Yostiq alla aytadi menga,
Uyqu kelar tushni ko'tarib.
Yetganimda tushimda senga,
Soat uyg'otadi yo'talib.

Uyg'onaman orzu bilan xush,
Xayolotga singib, suyaman.
Shamol esib qoladi sarxush,
Muhabbatning hidin tuyaman.

O'kinaman o'tmishni quchib,
Yo'qotishlar tegdi-ku jonga.
Men yuribman shuncha yil uchib,
Kelib-kelib qo'ndim hijronga.



Dahlizdagi eshik azador,
Hamon yig'lar deraza yum-yum.
Ko'rpalarning qovog'ida qor,
Kirlar yotar burchakda uyum.

Ayriliqdan ketaman to'yib,
Yuragimga orzu ekaman.
Derazaga hijronni qo'yib,
Sening ko'chang tomon ketaman...



MUZLAGAN NAFAS

Qor edim samodan otilgan,
Yuzingga urildim bexosdan.
Men o'sha, sochingga osilgan,
Muzlagan nafasman... nafasman.

Sharfingga ilinib turdim-ku,
Termuldim yuzingga betoqat.
Xayriyat! Ko'zingni ko'rdim-ku,
Yurakda uyg'ondi muhabbat!

Orzular – lahzalik, egilib
Sharfingni silkiding, to'kildim.
Etiging ostida ezilib,
Suv bo'ldim... Suv bo'ldim... Suv bo'ldim.

Bug'landim, bulutga aylandim,
Yomg'irman bu safar, qor emas.
Ko'zingni ko'rishga shaylandim,
Ko'zlaring ko'rishga zor emas.





Kipriyingdan yoshdek uzilib,
Zaminning kaftiga o'tyapman.
Yoyilib, sochilib, tizilib,
Sening etigingni kutyapman.

Farishtam, so'nggi bor men tomon
Kelsayding quvonchga to'lardim.
Tovoning o'pib men notavon,
Poyingda jon bergan bo'lardim...



QORBO'RON

Qor yog'moqda.
Boshdan oyoq qor,
Lablaringda titrardi sovuq.
Men emasman endi xaloskor,
Qish sen tomon otaverar o'q.

Go'yo quchsam erib ketasan,
Lek yoningda turar edim lol.
Begonadek o'tib ketasan,
Unsizdirman, so'rolmayman hol.

Esim qursin, sening ering bor,
Ulg'aygandir jajji farzanding.
Vujudimni qoplab oldi qor,
Faqat yurak ko'nmas – arzanda.

Shu alfozda turdim ancha vaqt,
Qorbo'ronga berib izmimni.
Ortginangdan boray desam, Baxt,
Qor bosibdi darrov izingni...



MUVOZANAT



Qor ko'ksini o'yib borar iz,
Sovuq tanda qisiladi ruh.
Nigoh turib qoladi olis,
Iz ostidan otiladi «uh».

Teraklarning marjoni quyosh,
Muallaqda suzadi bulut.
Sumalakning ko'zlarida yosh,
Maysalarning qo'shig'i unut.

Hechsizlikda yo'qolgan kabi,
Ayoz ichra sirg'anar tovush.
Go'yo qotil, jon olgan kabi,
Aybdordek turardi kovush.

Uy to'rida dam olar charchoq,
Pechkasiz uy ko'kka tikar ko'z.
Chiroqlar ham lipillar dardnok,
Gapirolmas muzlab qolgan so'z.

Shamollagan mo'ri yo'talar,
Yopiladi ohista eshik.
Milyon yillik kelin haydalar,
G'ijirlaydi bolasiz beshik.

Chorasizlik kelgandek g'olib,
Yo'laklarda to'xtab qolar tin.
Beshigiga bahorni solib,
Tebratadi haydalgan kelin...



AFSUN

Qish qorlarin sochib poyimga,
Qo'llarimdan yulqilar shamol.
Men bilaman, endi yonimga
Kelmas sira u sohibjamol.





Men baxtliday yashayman garchi,
U baxtliday yashaydi-yu, jim –
Goh tunlari yig'laydi dardchil,
Goh tunlari kelar o'kragim.

Sog'inchim bir o'zimga ayon,
Yuragimda – qora to'fonlar.
O'zanidan toshganda hijron,
Buziladi po'lat to'g'onlar.

Seni izlab boraman shunda,
Balki o'zing chiqqaysan peshvoz.
Oy osmonni qoplagan tunda
Baxt, visoldan aytajakmiz roz.

To tonggacha ko'zingga cho'kib,
Qarog'ingda qolgayman muqim.
Kipriging-la gul libos to'qib,
Uzatasan... Kiyadi ruhim...

...Bu bir ertak, ha, bu bir afsun,
Ishonmaydi hech kim so'zimga.
Yorijonim, koshkiydi bir tun
Mehmon bo'lsang sen ham ko'zimga...



TONG SOG'INCHI

Tun. Qahraton. Izillar shamol,
Derazani chertar bir tovush.
Ko'kdan ingan samoviy xayol
Yuragimga o'rnashgan xomush.

Chaqmoqlarga to'lar ko'zlarim,
Yurak tusar yomg'ir hidini.
G'oyib bo'lgan nodir so'zlarim,
Izlab yurar oyning izini.



Siqib kelar qorong'i, zulmat,
Isyon qilar sham-u chiroqlar.
Men – ziyoga tutingan ulfat,
Tomirimda nurli titroqlar.

Qaydan topmish quyoshim panoH?!
Ufqdan hech olmasman ko'zni.
Yuragimdan topgayman nogoh
Allakimdir yo'qotgan so'zni.

Ruhimda tong kezinib yurar,
Tiynatimda tiriklik kuyi.
Ko'zyoshlarim jonimni yuvar –
Kun ko'yida borar jon kuyib.

She'rdan o'zga malham topilmas,
Yog'du sochar tundan tonganCHA.
Tirik so'zlar bilan bedor, mast,
Jon saqlayman najot – tonggacha.

Nihoyat, tong otar. Yorug' tong!
O'z boshiga orttirib kulfat –
Chekinadi mag'lub qahraton,
Yomon tushday to'zg'iydi zulmat...



QOR

Olamni tun bosdi. Qoraydi borliq,
Yulduzlar erinib ochdi yuzini.
Ruhimga vujudim qilmoqda torlik,
Yurak ko'kragimga urar o'zini.

Bir o'jar istakki – ketmas jonimdan,
Qorong'ilik ichra nur izlar ko'zim.
Shu'lalar taralsa deyman qonimda,
Shamday yonib tursa har bitgan so'zim...



Xudoyim!
Eshigin ochdimi Samo,
Farishtalar yerga tushdi tong oldi.
So'ng yana ko'k sari uchdilar, ammo
Oppoq liboslari zaminda qoldi...



QISH

Uzun kecha muzlab chiqar qish,
Ochilmaydi eshik, deraza.
Ichkariga yo'q biror tirqish,
Issiq uyda uxlar proza.

Tashqarida sovuqda qolib,
Yuragida quyoshli niyat –
Qish qo'lini kaftiga olib,
Isitadi uyg'oq she'riyat...



XOTIRALAR

Ketib borar qorli yo'lda jim
Sendan qolgan xotiralarim.

Yiqitadi toyg'inchoq muzlar,
Nigohlaring kuzatar muztar.

Orzumizning butun joyi yo'q,
Goh tig' tilgan, goho tekkan o'q.

Armon otlig' qashqir talagan,
Umidimizni nimalagan.

Samodagi jami yulduzlar
Guvoh bo'lgan – uyqusiz ko'zlar.

Ammo sevgi bermas ekan jon,
Yashar ekan biz-la begumon.



Ishqimizdan bo'lgancha yodgor
Aro yo'lda xotiralar bor.

Mayli, mendan kechg'in butkul voz,
Faqat sendan bitta iltimos:

Iljni yo'q, qilmas hech ta'ma,
Ostonangga borsa, haydama.

Ketib borar qorli yo'lda jim
Sendan qolgan xotiralarim...



YURAGIMDA YASHAYDIGAN QIZ

Oymisan, quyoshmisan, yulduzmisan,
Tongmisan, tunmisan, kunduzmisan,
Qushmisan, ohumisan, qunduzmisan,
Yuragimda yashaydigan qiz?

Meni har baloga soladi bir kun,
Jonimni o'ldirmay oladi bir kun,
Sevgi-muhabbatdan tonadi bir kun,
Yuragimda yashaydigan qiz.

U ketar – yolg'izman olamda g'oyat,
U ketar – qildimmi og'ir jinoyat?!
Mendan malaklarga qilar shikoyat,
Yuragimda yashaydigan qiz.

Ketar – yurakdagi tamg'asi nechun?
Qonimda qoldirgan nag'masi nechun?
Meni kechir deyman hammasi uchun,
Yuragimda yashaydigan qiz.



KEL, YURAGIM

Jonim borar, joning izlab jonsarak,
Ikkinizga ishqdan boshqa ne kerak?
Savdoyidek kezib yurar bul yurak,
Xiyonatning ko'chasidan o'tmaylik,
Kel, yuragim, muhabbatdan ketmaylik.

Sevgi, seni yo'q dedilar, bor eding,
G'ururi-ku, yer dedilar, or eding,
Iymoni but insonlarga yor eding,
Xiyonatning ko'chasidan o'tmaylik,
Kel, yuragim, muhabbatdan ketmaylik.

Maysalarni silab, hidlab to'ymadim,
Sevib qolib osmonlarga bo'yladim,
Erta-yu kech faqat seni o'yladim,
Xiyonatning ko'chasidan o'tmaylik,
Kel, yuragim, muhabbatdan ketmaylik.

Nima bo'lar erta-indin – bilmaymiz,
Hayronamiz: na yig'lab, na kulgaymiz,
Yurakda ishq... demakki, biz o'lmaymiz,
Xiyonatning ko'chasidan o'tmaylik,
Kel, yuragim, muhabbatdan ketmaylik.



MUHABBAT HAQIDA ODDIY SHE'R

Tun. Ko'l uzra qalqib chiqdi oy,
Shitirlaydi bezovta qamish.
Ikki sharpa ishqdan, hoynahoy,
So'z ochadi. Bu safar xomush.

Goh ko'kdagi oyga termilib,
Goh tikilar ko'ldagi oyga.
Bir sharpaning boshi egilib,
Shivirlaydi: «Qaytaman uyga...»



Ular baxtli edi bir zamon,
Shu oy guvoh, guvoh ushbu ko'l.
Havas bilan boqardi osmon,
Huzurlanib eshildirdi yo'l.

Endi hijron chalar nog'ora,
Qirq kecha to'y berar ayriliq.
Arosatda sevgi owora,
Yo'l izlaydi ortga qayrilib.

Tong otmasa edi shu safar,
Tugamasa oying shu'lasi.
Quchar edi muhabbat zafar,
Kuylanardi ishq ashulasi.

Afsuski, tong bo'zardi. Quyosh
Tun ko'ksini tilib chok etdi.
Ikki sharpa – ikki tomchi yosh
To'lqinlarga qo'shilib ketdi.

Bir chayqaldi bag'ri to'lgan ko'l,
Bir titradi suvda siniq oy.
Visol sari ochilganday yo'l,
Baxt qasridan tekkan kabi joy...

Tag'in sevgi qildi tantana,
G'olib bo'ldi mag'rur muhabbat.
Ikki sharpa sohilda yana
To tonggacha quradi suhbat...





YOLG'IZLIK

Bedor tunni yolg'iz kezaman,
Yetaklayman oyni ortimdan.
G'amni ust-bosh kabi yechaman,
Sharf to'qiyman qishga dardimdan.

Olislayman hayotdan biroz,
Fuqarongman qabul qil, xayol.
Samovotdan otilar ovoz:
- Seni kutmas sen sevgan ayol.

Hijron aro tentiyman uzoq,
Tushlarimdan izlayman yechim,
Ta'biri yo'q ro'yolar tuzoq,
Fol ocholmas baxtimdan hech kim.

Xiralashar iqbol yulduzi,
Munajjimlar ko'zidan yiroq.
Mayli, oshiq qolsin yo'lsiz-u,
Yo'qolmasin manzili biroq.

Manzil aniq. Ko'ksingga qara,
Borish mumkin unga yo'laksiz.
Buzilmasin faqat bu qal'a,
Yashab bo'lmas, axir, yuraksiz!

Yashab bo'lmas, axir, yuraksiz!!



OSHIQ EDIM

Yor vasliga yetolmagan oshiq edim,
Qo'l siltab ham ketolmagan oshiq edim.
Ko'ngli bilan kuyib-kuyib ado bo'lgan,
Yor to'yiga o'tolmagan oshiq edim.

Bugun ko'kdan yomg'ir emas, yosh oqadi,
O, ko'ksimga mushdekkina tosh botadi.
Yor-yorlarning sadolari buncha g'amgin,
Yolg'izlikning yoronlari qosh qoqadi.



Tun bag'rini tilib-tilib yeladi kuy,
Kimni baxtli, kimni bebaxt qiladi to'y.
Yuragingni xotiralar tirnab tolmas,
Qo'ygin, meni bir lahza ham eslama, qo'y!

Endi senga yetti emas, yetmish yotman,
Yalla edim – avji achchiq faryod, dodman.
Ko'pkaridan uloq bilan chiqqan, ammo
Yarim yo'lda munkib ketgan mag'lub otman.

O'z holimdan so'z aytaman ozorlanib,
Ozorlanib, nomus qilib, oh, orlanib.
Hasratimni ko'msam hamki dil qa'riga,
Iztirobim sizib chiqqay goh zorlanib:

«Yor vasliga yetolmagan oshiq edim,
Qo'l siltab ham ketolmagan oshiq edim.
Ko'ngli bilan kuyib-kuyib ado bo'lgan,
Yor to'yiga o'tolmagan oshiq edim...»



ISHQ O'ZINGSAN

Ishq o'zingsan. Tushmi yo o'ngim,
Ixtiyorsiz jo'nar oyoqlar.
Siyratingni chizadi ko'nglim,
Muhabbatdan olib bo'yoqlar.

O'rtamizda ayriliq gullar,
Bepisandman hijron-u dardga.





Qanot bo'lib uchadi yo'llar,
Eltish uchun bizni murodga.

Yolg'on emas bu dunyosi – chin,
Orzumizni qoplamas ro'yo.
Sevgimizning borligi uchun,
Qarimaydi navqiron dunyo.

Mangu yoshmiz.
Sodiq qolsak gar,
Chalg'itmasa bizni xiyonat –
Sevgimizni qoplamasa gard,
Bu dunyoda qo'pmas qiyomat...



RAQS

Tun ko'ksida o'ynoqlar shamol,
Gullar nurdan to'qiydi qo'shiq.
Kengliklarda kezinib xayol,
Yulduzlarga bo'ladi oshiq.

Gullar qo'shiq aytadi rangin,
Turfa tusda ochilgan nota.
Shabbodalar o'ynaydi gangib,
Maysalarning kuyi bexato.

Uylar vazmin,
Go'yo tosh qotgan,
Yuragida ne og'ir o'ylar.
Oyoqlari zaminga botgan,
Tushlarida o'ynaydi uylar...



MENI YASHAB O'TAR BOLALIK



Osmonlarga tikilib tunda,
Yulduzlardan ko'ngil so'radim.
Shudring tushgan bir sohir tongda
Men shaharga qarab jo'nadim.

Mana, shahar!
Ko'zlarim quvnar,
Uylar baland, baland daraxtlar...
Umrim bo'yi ortimdan quvlar
Qishlog'imdan ergashgan baxtlar.

Faqat so'zlar kirar tushimga,
She'r bo'ladi chang yo'l, bedazor.
Yuragimning sayroq qushi-da
Kengliklarga talpinadi zor. '

Ha, qiyofam o'zgargani rost,
Qarashlarim o'zgardi ancha.
Ko'ngil deydi: - Bor, o'zingni os,
Aro yo'lda sayoq yurguncha.

Bu yerlarda ko'p ekan xatar,
Quyosh, o'zing qilgin og'alik.
Qishlog'imga yetgunga qadar
Meni yashab o'tar bolalik...



SOAT MILLARI

Asrlar muqaddam bir oqil odam
Soatni yaratib shaharga osdi.
Shu lahzadan boshlab hisobli olam
Soat millarining ortidan shoshdi.



Kunlar soatlarga bo'linib oldi,
Soatlar sochildi daqiqalarga.
Bo'g'zimga bir lahza tiqilib qoldi,
Shu lahza yo'l ochgay haqiqatlarga...

Vaqt nisbiy. Nisbiydir soat millari,
Garchi ular betin yugurib tolmas:
Yashalmagan oylar, ruhsiz yillaring
Tirik soniyaga teng kela olmas!



MANGU HAYOT

Men mangu yashashga qilindim mahkum,
Endi o'limimni yurmayman kutib.
Endi ko'zlarimni qoplamaydi qum,
Meni yer bus-butun ketmaydi yutib.

Vaqtlar bo'ysinadi nigohlarimga,
Quyosh ko'zlarimning o'tida kuyar.
Shamol haydab ketar gunohlarimni,
Nurga aylanadi hattoki kuya.

Suvlar teskariga oqar, xohlasam,
Tog'lar suzib yurar bahri ummonda.
Yulduzlar to'kilar yerga, yo'qlasam,
Bulutlar qaynaydi qora qumg'onda.

Ha, mangu yashayman,
Yo'q endi o'lim,
Ruhimga qo'shilib yosharadi tan.
Axir, ko'p yasha, deb alqaydi elim,
Axir, obi hayot berar bu Vatan!





MUNDARIJA

Yodimda.....	3	Qorbo'ron.....	18
Alla.....	4	Muvozanat.....	19
Alpomish haqida she'r..	5	Afsun.....	19
O'git.....	6	Tong sog'inchi.....	20
Malika.....	7	Qor.....	21
Ko'pkari.....	8	Qish.....	22
Yodgor monologi.....	9	Xotiralar.....	22
O'lan.....	10	Yuragimda	
Yomg'ir yog'ar.....	10	yashaydigan qiz.....	23
Bahor.....	11	Kel, yuragim.....	24
Ichikish.....	12	Muhabbat haqida	
Muhabbatning		oddiy she'r.....	24
qo'shig'i.....	12	Yolg'izlik.....	26
Birinchi sevgi.....	13	Oshiq edim.....	26
Qo'shni qiz.....	14	Ishq o'zingsan.....	27
Oy.....	14	Raqs.....	28
Bedorlik.....	15	Meni yashab o'tar	
Tomosha.....	15	bolalik.....	29
Hijron.....	16	Soat millari.....	30
Muzlagan nafas.....	17	Mangu hayot.....	30



Adabiy-badiiy nashr

BIRINCHI KITOBIM

Elyor MUROD

TIRIKLIK QO'SHIG'I

She'rlar



Muharrir **Davron Ulug'murodov**
Badiiy muharrir **Nasiba Adilxanova**
Texnik muharrir **Yelena Tolocho**
Musahhah **Dilafro'z Choriyeva**
Matn teruvchi **Gulchehra Azizova**

Litsenziya raqami AI № 163. 09.11.2009. Bosishga 2017-yil 15-iyunda ruxsat etildi. Bichimi 70×90¹/₃₂. Ofset qog'ozi. Pragmatica garniturası. Shartli bosma tabog'i 1,17. Nashr tabog'i 1,22. Adadi 7000 nusxa. Shartnoma № 85-2017. Buyurtma № 217-17^A.

O'zbekiston matbuot va axborot agentligining Cho'lpon nomidagi nashriyot-matbaa ijodiy uyi. 100011, Toshkent, Navoiy ko'chasi, 30.
Telefon: (371) 244-10-45. Faks: (371) 244-58-55.

O'zbekiston matbuot va axborot agentligining «O'qituvchi» nashriyot-matbaa ijodiy uyida chop etildi. 100206, Toshkent, Yunusobod dahasi, Yangi shahar, 1.

